

## Dag 11 – Jesus se geboorte



Jesus se geboorte kan ons eintlik enige tyd van die jaar vier. Dis so 'n mooi storie. Dit is ook nou die volgende storie in ons toer deur die Bybel. As julle kersliggies het, sit dit in 'n mooi pot op die tafel waar julle sit en lees. In plaas daarvan om vir mekaar geskenke te gee, gee vir mekaar 'n mooi kompliment!

**Woord:** Mattheus 1:18 -25; Mattheus 2:1-12; Lukas 1: 26-38; Lukas 2:1-20

(video van storie ook beskikbaar by: <https://www.bible.com/af/kids>)



Die verhaal van Jesus se geboorte is een van die mooiste verhale van genade en liefde. Ons het al die dele van Jesus se geboorte gevat en dit hier bymekaar gesit.

### Die Verhaal van Jesus se geboorte

Die verhaal van Jesus se geboorte begin by 'n jong meisie met die naam Maria. Maria was 'n jong meisie wat in Nasaret gebly het. Terwyl sy eendag by haar huisie besig was, staan daar skielik 'n engel by haar. Maria het baie groot geskrik, maar die engel sê vir haar. Moenie bang wees nie Maria, want ek bring vir jou goeie nuus. Jy gaan swanger word en 'n Seun in die wêreld bring en jy moet Hom Jesus noem.

Maria was baie verbaas en sê vir die engel dat dit onmoontlik is, want sy het nie 'n man nie, maar die engel sê vir haar: die Here sal dit laat gebeur en daarom sal die een wat gebore word die Seun van God genoem word.

Maria sê toe vir die engel: laat met my gebeur soos die Here wil. Die engel het toe van Maria af weggegaan.



Keiser Augustus het 'n bevel uitgevaardig dat almal in sy ryk getel moes word. Almal moes hulle in hulle eie stad laat inskryf. Josef en Maria moes van Nasaret gaan om hulle te laat inskryf. Toe hulle in Betlehem kom, was al die herberge vol, daar was vir hulle geen

## Durbanville Gemeente - Bybelstudie vir families

slaapplek nie. Uiteindelik het hulle slaapplek in 'n skoon stal gekry. Daardie nag is Maria se baba daar in die stal gebore, sy naam was Jesus. Maria het hom in doeke toegedraai en in die krip neergelê.

In die velde buite Betlehem was herders wat hulle skape opgepas het. Terwyl hulle so bymekaar sit, staan daar skielik 'n engel by hulle. Hulle het baie groot geskrik, maar die engel sê vir hulle: Moenie bang wees nie, want ek bring vir julle 'n goeie tyding van groot blydskap wat vir die hele volk bestem is. Vandag is daar vir julle in die stad van Dawid die Verlosser gebore, Christus die Here. En dit is vir julle die teken, julle sal 'n kindjie vind wat in doeke toegedraai is en in 'n krip lê. Skielik was daar saam met die engel 'n menigte engele wat God prys.



Toe het die engele weer weggegaan. Die herders praat met mekaar oor hierdie wonderlike nuus wat hulle gekry het, en besluit om na Betlehem te gaan en te sien wat gebeur het. Daar in die stal het hulle vir Koning Jesus, Josef en Maria gekry. Dit was net soos die engel vir hulle vertel het, en hulle was baie bly gewees.

In 'n ver land het sterrekykers gebly wat die sterre bestudeer het. Eendag sien hulle 'n vreemde nuwe ster in die hemel. Hulle was baie opgewonde want hierdie ster het beteken dat daar 'n nuwe koning gebore is. Hulle besluit toe om na hierdie koning te gaan soek.



Die ster wat hulle gesien het, het al voor hulle uitgegaan en toe hulle in Betlehem kom, het die ster gaan staan reg bokant die plek waar Josef, Maria en Jesus was. Die sterrekykers het vir Josef en Maria vertel van die ster wat hulle na Betlehem gelei het en dat hierdie ster wys dat daar 'n nuwe koning gebore is. Toe het hulle neergekniel en hulle geskenke vir Jesus gegee: goud, wierook en mirre.

Dit bly maar 'n mooi verhaal, maar die wonderlikste van alles is dat dit nie die einde van Jesus se verhaal is nie, dis maar net die begin. Ons lees more verder.



## Gesels as gesin oor die volgende vrae

1. Wie het aan Maria verskyn?
2. Wat het hy aan Maria gesê?
3. Aan wie het die engel volgende verskyn?
4. Aan wie het die engel in die veld verskyn?
5. Behalwe die skaapwagters, wie het nog vir Jesus besoek?
6. Wat het hulle na Hom toe gelei?
7. Wat het hulle vir hom gegee as geskenke?
8. Wat is ons grootste geskenk vir Kersfees?

Gewoonlik vier ons Jesus se geboorte oor Kersfees. Maar soms dink ons so aan al die geskenke dat ons vergeet waaroor dit regtig gaan.

Jesus se geboorte is nie net 'n storie oor 'n baba nie - dit is 'n storie wat ons almal se lewens verander het. Sonder Jesus sou ons sondes nie vergewe kon word nie! Daarom moet ons altyd - nie net oor Kerstyd nie - Jesus se geboorte en lewe vier.

## Gebed

Here dankie dat ons vandag ook U verjaarsdag kan vier. Dankie dat U U seun vir ons gestuur het as ons grootste Kersgeskenk.

## Aktiwiteit 1

Versier of knip 'n paar mooi sterre uit en hang dit voor jou venster.



## Aktiwiteit 2

Hier is 'n maklike koekieresep met net 3 bestandele. Druk dit uit met 'n sterrietjie koekiedrukker. Dan het julle sommer genoeg koekies vir die res van die 'lockdown' tydperk!

### 3 bestandele koekies

Bestandele:

1kg koekmeel

500g Versiersuiker

1kg Botter



Metode:

1. Meng saam, rol die deeg uit en druk vormpies uit. Jy kan sterretjies of hartjies uitdruk.
2. Bak vir 10 min of tot goud bruin op 180° C.

Dit is hoe eenvouding hierdie klein koekie resep nou eintlik is. Letterlik net 3 bestandele om hierdie lekker 3 bestandele koekies te maak.

## Inkleurprent

Druk prent op bladsy 5 uit.

